

HAFIZI BEHRAM-BEGOVE MEDRESE U TUZLI

UVOD

Behram-begova medresa u Tuzli, kao najstarija odgojno-obrazovna institucija u sjeveroistočnoj Bosni, i njeni muderrisi, inspirisani kur'anskim ajetima i hadisima Muhammeda a.s. koji govore o vrijednosti učenja Kur'ana napamet, na svoje učenike prenose želju i podstiču ih na putu sticanja zvanja hafiz Časnog Kur'ana. U periodu obnovljenog rada Behram-begove medrese, od 1993. godine do danas, ova odgojno-obrazovna ustanova je promovisala devedest dva hafiza.

U prošlim brojevima Kapije, godišnjaka Behram-begove medrese u Tuzli, predstavili smo hafize Medrese u periodu od 1993. do 2021. godine. U tom periodu hifz je završilo osamdeset četiri učenika i svršenika Medrese. U ovom radu predstavljamo hafize Behram-begove medrese koji su najčasniju titulu stekli u 2022. godini.

HAFIZI

85. Hfz. Avdibašić Ahmed – sin Elmedina i Nizame, rođen 24.12.2004. godine u Tuzli. Prva tri razreda osnovne škole završio je u Osnovnoj školi Slavinovići, a od IV do IX razreda svoje osnovno

obrazovanje nastavio je u Međunarodnoj Richmond Park školi u Tuzli, u kojoj je na raznim općinskim, kantonalnim i internacionalnim takmičenjima osvojio zapažene rezultate. Školu Kur'ana Medžlisa Islamske zajednice Tuzla pohađao je od šeste godine i učestvovao na mnogim takmičenjima koje je organizirala, na kojima je više puta osvojio prvo mjesto. U školi Kur'ana je počeo i s memorisanjem prvih kur'anskih stranica. Uporedo je pohađao i mektepsku nastavu u džematu Slavinovići, u sklopu koje je također osvojio zapažene rezultate na takmičenjima na nivou Medžlisa, ali i Muftijstva tuzlanskog. Hifz je počeo učiti kada je imao 7 godina, a završio ga 5 godina kasnije. Njegov muhafiiz je hafiz Ahmed-ef. Huskanović. Hifz je polagao pred Komisijom za hifz Rijasetu Islamske zajednice u BiH u periodu od 17.4.2017. do 1.5.2017. godine. Hafiska dova mu je proučena 17.5.2017. godine u Džamiji Kralj Abdullah u Tuzli. Od svoje devete godine uči hafisku mukabelu u Tuzli. Nakon završenog hifza učestvovao je na takmičenjima iz hifza u organizaciji Fondacije za hifz Časnog Kur'ana. Sa 13 godina učestvovao je na Međunarodnom seminaru za usavršavanje hifza i tedžvida na kojem je dobio idžazu za proučen cijeli Kur'an od šejha Abdullaha bin Saliha el-Abda po Asimovom Kiraetu. Trenutno je učenik IV razreda Behram-begove medrese u Tuzli, a tokom dosadašnjeg školovanja je superodličan učenik.

86. Hfz. Omerbašić Zulejha - kćerka Nermina i Emine, rođena 9.1.2004. godine u Tuzli. Živi u Lukavcu, gdje je završila Osnovnu školu "Lukavac Grad". U Behram-begovu medresu u Tuzli upisala se 2018. godine. Hifz je počela učiti u aprilu 2019. godine. Njen muhafiiz je hafiz Abdullah Kapo, profesor u Behram-begovoj medresi u Tuzli. Hifz je polagala pred Komisijom za hifz Rijasetu Islamske zajednice u BiH u periodu od 30.1.2022. do 13.2.2022. godine. Hafiska dova joj je proučena 16.3.2022. godine u džamiji Behram-begove medrese u Tuzli. Behram-begovu medresu je završila u junu 2022. godine. Studentica je prve godine Fakulteta islamskih nauka u Sarajevu.

87. Hfz. Subašić Anis - sin Adisa i Medine, rođen 31.3.2002. godine u Zenici. Odrastao je u Tešnju, gdje je završio osnovnu školu. Nakon osnovne škole, školovanje je nastavio u Behram begovoj medresi u Tuzli, u periodu od 2017. do 2021. godine. Hifz je polagao pred Komisijom za hifz Rijasetu Islamske zajednice u BiH u periodu od 26.2. do 12.3.2022. godine. Njegov muhaffiz bio je hafiz Nedžad

Vehabović, profesor u Behram-begovoj medresi u Tuzli. Hafiska dova mu je proučena 16.3.2022. godine u džamiji Behram-begove medrese u Tuzli. Trenutno je student Ekonomskog fakulteta u Sarajevu i Fakulteta islamskih nauka u Sarajevu.

88. Hfz. Halilović Zejneb – kćerka Muhidina i Hajrije, rođena 23.8.2002. godine u Šempetru pri Gorici, Republika Slovenija. Živi u Brčkom. Behram-begovu medresu u Tuzli je završila 2022. godine. Hifz je polagala pred Komisijom za hifz Rijasetu Islamske zajednice u BiH u periodu od 7.6.2022. do 21.6.2022. godine. Njen muhaffiz je hafiz Nedžad Vehabović, profesor u Behram-begovoj medresi u Tuzli.

Trenutno je studentica Fakulteta zdravstvenog studija, Odsjek laboratorijske tehnologije.

89. Hfz. Mujkanović Muamer - sin Sakiba i Elide, rođen 10.10.1995. godine u Tuzli. Osnovnu školu završio je u Tuzli. Pohađao je Behram-begovu medresu u Tuzli od 2010. do 2014. godine. Njegov muhaffiz je hafiz Velid Kalabić. Hifz je polagao pred Komisijom za hifz Rijasetu Islamske zajednice u BiH u periodu od 13.7.2022. do 27.7.2022. godine. Hafiska dova mu je proučena u džamiji džemata Seljublje (MIZ Kalesija), 9.10.2022. godine. Trenutno je apsolvent na Fakultetu islamskih nauka u Sarajevu.

90. Hfz. Aličić Esma - kćerka Selvira i Šemse, rođena 25.8.2002. godine u Tešnju. U devetoj godini naučila je Amme džuz pred hafizom Zaim-ef. Šiljićem. U toku osnovnoškolskog obrazovanja, bila je učesnica kantonalnih takmičenja iz fizike i informatike. Završila je Osnovnu školu "21. mart" u Matuzićima, 2017. godine, kao učenica generacije. Iste godine upisala se u Behram-begovu medresu u Tuzli, gdje je počela učiti hifz pred hafizom Abdullahom Kapom. Kao učenica Medrese, učestovala je u radu školskog časopisa "Misak" u čijoj redakciji je bila lektor, a kasnije i zamjenik urednika. Školovanje u Medresi je završila 2021. godine, odličnim uspjehom i primjernim vladanjem. Hifz je polagala pred Komisijom za hifz Rijasetu Islamske zajednice u BiH u periodu od 5.10.2022. do 19.10.2022. godine. Hafiska dova joj je proučena u Islamskom centru u Matuzićima, 6.11.2022. godine. Trenutno je studentica II godine Politehničkog fakulteta Univerziteta u Zenici, Odsjek softversko inženjerstvo.

91. Hfz. Sinanović Tarik – Sin Damira i Ivane, rođen 2.12.2004. godine u Tuzli. Osnovnu školu je završio u Tuzli 2019. godine. Iste godine upisao se u Behram-begovu medresu u Tuzli, u kojoj je trenutno učenik IV razreda. Arapsko pismo je naučio u I razredu Medrese, a hifz je počeo učiti u II razredu Medrese. Hifz je polagao pred Komisijom za hifz Rijaseta Islamske zajednice u BiH u periodu od 7.10.2022. do 21.10.2022. godine. Njegov muhaffiz je hafiz Nedžad Vehabović, profesor u Behram-begovoj medresi u Tuzli. Hafiska dova mu je proučena u džamiji Behram-begove medrese u Tuzli, 8.12.2022. godine.

92. Hfz. Baturić Lejla – kćerka Hajrudina i Aide, rođena 19. 5.2006. godine u Tuzli. Završila je Osnovnu školu „Musa Ćazim Ćatić“ u Zelinji Donjoj, kao učenica generacije. Tokom osnovnoškolskog obrazovanja postigla je zapažene rezultate na takmičenjima iz fizike, matematike i životopisa Božijeg poslanika Muhammeda, a.s. Hifz je polagala pred Komisijom za hifz Rijaseta Islamske zajednice u BiH u periodu od 21.11.2022. do 30.11.2002. godine. Njen muhaffiz je hafiz Mirnes-ef. Spahić, profesor kiraeta u Behram-begovoj medresi u Tuzli. Trenutno je učenica II razreda Behram-begove medrese u Tuzli.

ZAKLJUČAK

Behram-begova medresa je u svom obnovljenom radu, od 1993. do danas promovisala ukupno devedeset dva hafiza. Od tog broja dvojica hafiza su profesori u Medresi, šezdeset jedan je muških i dvadeset devet ženskih hafiza. Tokom 2022. godine, ukupno sedam učenika Behram-begove medrese je steklo časnu titulu hafiza Kur'ana.

Aktivan rad voditelja sekcije hifza u Behram-begovoj medresi, veliki broj učenika koji uče hifz i koji su na putu da steknu časnu titulu hafiza Kur'ana, garant su da će se, uz Allahovu pomoć, broj hafiza tuzlanske medrese iz godine u godinu stalno povećavati.

Učite Kur'an, jer Uzvišeni Allah neće kazniti srce u kojem je Kur'an. Kur'an je Allahova gozba, siguran je onaj ko joj prisustvuje, i neka se raduje nagradi onaj ko voli Kur'an. (Hadis)

Nedžad Vehabović